

四庫全書

史部

# 欽定四庫全書

史部

唐律疏義卷

二十七至  
三十

詳校官侍講學士臣法武善

編修臣程嘉謨覆勘

總校官編修臣王燕緒

校對官主事臣陳墉

謄錄監生臣張泰

欽定四庫全書

唐律疏義卷二十七

唐 長孫無忌等 撰

雜律下

凡二十  
八條

在市人衆中驚動

諸在市及人衆中故相驚動令擾亂者杖八十以故殺  
傷人者減故殺傷一等因失財物者坐贓論其誤驚殺  
傷人者從過失法

疏義曰有人在市內及衆聚之處故相驚動謂誑言有猛獸之類令擾亂者杖八十若因擾亂之際而失財物坐贓論如是衆人之法累併倍論併倍不加重於一人失財物者即從重論因其擾亂而殺傷人者減故殺傷一等驚人致死減一等流三千里折一支減一等徒三年之類其有誤驚因而殺傷人者從過失法收贖銅入被傷殺之家

失時不修隄防

諸不修隄防及修而失時者主司杖七十毀害人家漂  
失財物者坐贓論減五等以故殺傷人者減鬪殺傷罪  
三等

謂水流漂害於人即  
人自涉而死者非

即水雨過常非人力所防者

### 勿論

疏義曰依營繕令近河及大水有隄防之處刺史縣  
令以時檢校若須修理每秋收訖量功多少差人夫  
修理若暴水汎溢損壞隄防交為人患者先即修營  
不拘時限若損壞當時不即修補或修而失時者主

司杖七十毀害人家謂因不修補及修而失時為水  
毀害人家漂失財物者坐贓論減五等謂失十足杖  
六十罪止杖一百若失衆人之物亦合倍論以故殺  
傷人者減鬪殺傷罪三等謂殺人者徒二年半折一  
支者徒一年半之類

註云謂水漂流害於人謂由不修理隄防而損害人  
家及行旅被水漂流而致死傷者即人自涉而死者  
非所司不坐即水雨過常非人力所防者無罪

其津濟之處應造橋航及應置船棧而不造置及擅移  
橋濟者杖七十停廢行人者杖一百

疏義曰津濟之處應造橋航謂河津濟渡之處應造  
橋及航者編舟作棧及應置舟船及須以竹木為棧  
以渡行人而不造置及擅移橋梁濟渡之所者各杖  
七十停廢行人謂不造橋船及不置船棧并擅移橋  
濟停廢行人者杖一百

盜決隄防

諸盜決隄防者杖一百

謂盜水以供私用若為官檢校雖供官用亦是

若毀害

人家及漂失財物者贓重者坐贓論以故殺傷人者減  
聞殺傷罪一等若通水入人家致毀害者亦如之

疏義曰有人盜決隄防取水供用無問公私各杖一  
百故注云謂盜水以供私用若為官檢校雖供官用  
亦同水若為官即是公坐若毀害人家謂因盜水汎  
濫以害人家漂失財物計贓罪重於杖一百者即計  
所失財物坐贓論謂十足徒一年十足加一等以故



殺傷人謂以決水之故殺傷者減殺傷罪一等若通水入人家致毀害殺傷者一同盜決之罪故云亦如之

其故決隄防者徒三年漂失賊重者準盜論以故殺傷人者以故殺傷論

疏義曰上文盜水因有殺傷此云故決隄防者謂非因盜水或挾嫌隙或恐水漂流自損之類而故決之者徒三年漂失之賊重於徒三年謂漂失人三十足

賊者準盜論合流二千里若失衆人之物亦合倍論以決隄防之故而殺傷人者以故殺傷論謂殺人者合斬折人一支流二千里之類上條殺傷人減聞殺傷罪一等有殺傷畜產償減價餘條準此今以故殺傷論其殺傷畜產明償減價下條水火損敗故犯者徵償

乘官船衣糧

諸應乘官船者聽載衣糧二百斤違限私載若受寄及

寄之者五十斤及一人各笞五十一百斤及二人各杖

一百

但載即坐若家人隨從者勿論

每一百斤及二人各加一等罪止

徒二年

疏義曰應乘官船之人聽載隨身衣糧二百斤若二百斤外更載若受人寄物及寄物之人物滿五十斤及一人者各笞五十一百斤及二人各杖一百稱各者謂人之與物得罪各等亦不限所載遠近故云但載即坐若將家人隨從者皆不坐每一百斤及二人

各加一等罪止徒二年

從軍征討者各加二等監當主司知而聽之與同罪空船者不用此律

疏義曰從軍征討者謂以船轉渾軍資而私自載物若受寄及寄之者各加二等謂五十斤及一人各杖七十一百斤及二人各徒一年半每一百斤及二人各加一等罪止徒三年監當主司知而聽之謂監船官司知乘船人私載受寄者與寄之者罪同故云與

同罪若是空船雖私載受寄準行程無違者並悉無罪故云不用此律

茹船不如法

諸船人行船茹船寫漏安標宿止不如法若船棧應迴避而不迴避者笞五十以故損失官私財物者坐贓論減五等殺傷人者減闕殺傷三等

疏義曰船人為公私行船之人茹船謂茹塞船縫寫漏謂寫去漏水安標宿止謂行船宿泊之所須在浦

島之內仍即安標使來者候望違者是不如法若船  
牴應迴避者或汭沂相逢或在洲嶼險處不相迴避  
覆溺者多須準行船之法各相迴避若湍磧之處即  
沂上者避汭流之類違者各笞五十以不如寫迴避  
之故損失官司財物者坐贓論減五等謂十足杖六  
十足加一等罪止杖一百殺傷人者減鬪殺傷罪  
二等殺人者徒二年半折傷一支者徒一年半之類  
其於湍漬尤難之處致有損害者又減二等監當主司

各減一等卒遇風浪者勿論

疏義曰激水為湍積石為磧謂湍磧險難之所其有  
損失財物或殺傷人者又減二等謂失財物於坐賊  
上減七等殺傷人者減聞殺傷五等監當主司各減  
一等謂各減行船人罪一等卒遇暴風巨浪而損失  
財物及殺傷人者並不坐

山陵兆域內失火

諸於山陵兆域內失火者徒二年延燒林木者流二千

里殺傷人者減閭殺傷一等其在外失火而延燒者各

減一等

餘條在外失火準此

疏義曰山陵前已釋訖兆域者鄧展云除地為塋將有形兆韋昭曰兆域也起土為塋域孝經曰卜其宅兆而安厝之然山陵兆域之所皆有宿衛之人而於此內失火者徒二年延燒兆域內林木者流二千里殺傷人者減閭殺傷一等其在外失火謂於兆域外失火延燒兆域內及林木者各減一等謂延燒兆



域內徒二年上減一等若延燒林木者流二千里上減一等註云餘條在外失火準此餘條謂庫藏以下諸條因在外失火延燒者減於內失火一等

庫藏倉不得燃火

諸庫藏及倉內皆不得燃火違者徒一年

疏義曰凡官庫藏及倉教內有舍者皆不得燃火違者徒一年

非時燒田野

諸失火及非時燒田野者笞五十

非時謂二月一日以後十月三十日以前

若鄉土異宜者依鄉法

延燒人舍宅及財物者杖八十賊重者

坐贓論減三等殺傷人者減聞殺傷二等

疏義曰失火謂失火有所燒及不依令文節制而非時燒田野者笞五十其於當家之內失火者皆罪失火之人註云非時謂二月一日以後十月三十日以前若鄉土異宜者依鄉法謂北地霜早南地晚寒風土亦既異宜各須收穫總了放火時節不可一準令

文故云各依鄉法延燒人舍宅及財物者各杖八十  
賊重者謂計賊得罪重於杖八十坐賊論減三等準  
賊二十足以上即從賊科殺傷人者減闕殺傷罪二等  
謂燒殺人者失火及燒田之人減死二等合徒三年  
不合償死者從本殺傷罪減其賊若損衆家之物者  
併累亦倍論

其行道燃火不滅而致延燒者各減一等

疏義曰人在行路之上或須燃火事了發去皆須滅

之若不撲滅而致延燒他人林木舍宅財物或殺傷人者各減上文罪一等謂延燒賊少者杖八十上減一等賊重者坐賊上減四等罪止徒一年殺傷人者減閹殺傷三等故云各減一等

官府倉庫失火

諸於官府廨院及倉庫內失火者徒二年在宮內加二等

等

廟社內亦同

損害賊重者坐賊論殺傷人者減閹殺傷一

等延燒廟及官闕者絞社減一等

疏義曰若有人於內外官府公廨院宇之中及倉庫  
內失火者徒二年宮內加二等宮內謂殿門外有禁  
門其內並是若失火者徒三年註云廟社內亦同謂  
於宗廟及太社院內失火亦徒三年損害賊重者謂  
因失火延燒有所損害財物計賊重於徒二年者即  
準坐賊科之謂燒官府廨內財物計賊五十足合徒  
三年若因火有殺傷人者減聞殺傷罪一等謂殺人  
者流三千里傷人折二支徒三年若殺傷畜產不合

從上條稱減闕殺傷一等償減價自從水火損敗誤失不償延燒廟及官闕者絞社減一等流三千里

燒官府私家宅舍

諸故燒官府廨舍及私家舍宅若財物者徒三年贓滿五疋流二千里十足絞殺傷人者以故殺傷論

疏義曰凡官府廨宇及私家舍宅無問舍宇大小并及財物多少但故燒者徒三年計贓滿五疋流二千里贓滿十足者絞殺傷人者以故殺傷論謂因放火

而殺人者斬傷人折一支者流二千里之類若對主故燒非積聚延燒之物只同棄毀人財物論

見火起不告救

諸見火起應告不告應救不救減失火罪二等

謂從本失罪減

其守衛宮殿倉庫及掌囚者皆不得離所失守救火違者杖一百

疏義曰見火起燒公私廨宇舍宅財物者並須告見在及鄰近之人共救若不告不救減失火罪二等謂

若於官府廨宇內及倉庫從徒二年上減二等合徒  
一年若於宮及廟社內從徒三年上減二等徒二年  
若於私家從笞五十上減二等笞三十故註云從本  
失罪減明即不從延燒減之其守衛宮殿倉庫及掌  
囚者雖見火起並不得離所守救火違者杖一百雖  
見火起不告亦不合罪

水火損敗徵償

諸水火有所損敗故犯者徵償誤失者不償



疏義曰水火有所損敗謂上諸條稱水火損敗得罪之處故犯者徵償若故決隄防通水入人家若故燒官府廨舍及私家舍宅財物有所損敗之類各徵償其稱失火之處及不修隄防而致損害之類各不償毀神御之物

諸棄毀大祀神御之物若御寶垂輿服御物及非服而御者各以盜論亡失及誤毀者準盜論減二等

疏義曰棄毀大祀神御之物祠令天地宗廟神州等

為大祀神御謂供神所御之物若御寶謂皇帝八寶  
太皇太后皇太后皇后寶以稱御者三后亦同乘輿  
服御物謂皇帝服御之物及非服而御謂帷帳几杖  
之屬非服而供御者以上義名例及職制並具釋訖  
有棄毀者各以盜論盜律盜大祀神御之物乘輿服  
御物者流二千五百里非服而御之物徒一年半贓  
重者計贓各加凡盜一等盜御寶者絞稱以盜論者與  
真盜同入十惡非服而御之物等不入十惡據盜律

其擬供神御及供而廢闕若饗薦之具已饌呈者徒  
二年未饌呈者徒一年半又盜御寶條擬供服御等  
亦並徒二年今此條上言棄毀大祀下稱非服而御  
以盜論準非服而御徒一年半舉下明上即棄毀擬  
供服御準罪徒一年半以上亦各以盜論亡失及誤  
毀者準盜論減二等並各從準盜罪上減二等準盜  
論不在除免倍贓監主加罪加役流之例棄毀中祀  
神御之物減大祀二等棄毀小祀神御之物又減二

等中祀以下不入十惡

毀大祀丘壇

諸大祀丘壇將行事有守衛而毀者流二千里非行事日徒一年壇門各減二等

疏義曰大祀丘壇謂祀天於圓丘祭地於方丘五時迎氣祀五方上帝並各有壇此等將行祭祀各有守衛此時有損壞丘壇者流二千里非行事日謂非祭祀之日而毀者徒一年壇門各減二等壇門謂丘壇

之外擁土為門毀墮門者將行事之日徒二年半非  
行事日杖九十故云各減二等毀中小祀各遞減二  
等

毀棄符節印

諸棄毀符節印及門鑰者各準盜論亡失及誤毀者各  
減二等

疏義曰棄毀符節印及門鑰者各準盜法論罪盜律  
盜宮殿門符發兵符傳符流二千里使節及皇城京

城門符徒三年餘符徒一年門鑰各減三等盜官文書印徒二年餘印杖一百其亡失符節印以下誤毀者各減二等謂各減棄毀之罪二等

棄毀制書官文書

諸棄毀制書及官文書者準盜論亡失及誤毀者各減

二等

毀須失文字若欲動事者從詐增減法

其誤毀失符移解牒者杖六

十

謂未入所司而有本案者

疏義曰棄毀制書棄毀不相須毀者須失文字制書

勅及奏抄亦同官文書謂曹司所行公案及符移解牒之類準盜論謂各準盜法得罪盜律盜制書者徒二年官文書杖一百亡失謂不覺遺落及被盜誤毀謂誤致毀損破失文字各減二等故註云毀須失文字謂制勅奏抄徒一年官文書杖八十若盜毀欲動事者自從增減法制勅及奏抄合死官文書即依詐僞律詐為官文書及增減法主司自有所避即從違式造立科罪杖罪以下杖一百徒罪以上加一等誤

毀符移解牒者杖六十註云謂未入所司而有本案者謂未入曹司之間而即誤致毀者闕刺律雖無文亦與符移同罪

私發官文書印封

諸私發官文書印封視書者杖六十制書杖八十若密事各依漏泄坐減二等即誤發視者各減二等不視者不坐

疏義曰官司行下文書多有封印而有私發印封視



書者杖六十視制書杖八十若密事各依漏泄坐減  
二等職制律漏泄大事應密者絞減二等徒三年非  
大事應密徒一年半減二等杖一百誤發視者各減  
二等謂誤發因視制書杖六十官文書笞四十大事  
應密視者徒三年上減二等徒二年應密非大事視  
者杖一百上減二等杖八十不視者不坐謂初雖誤  
發意不視書者無罪

官物亡失簿書

諸主守官物而亡失簿書致數有乖錯者計所錯數以主司不覺盜論

疏義曰凡是官物皆立簿書主守之人亡失簿書為失簿書之故遂令物數乖錯者計所錯之數依不覺盜論廐庫律主司不覺盜者五尺答二十十足加一等過杖一百二十足加一等罪止徒二年

其主典替代者文案皆立正案分付後人違者杖一百

並去官  
不免

疏義曰謂主典替代所有文案皆須立正案分付承  
後人違而不付者合杖一百縱雖去官 不同名例  
免法故註云並去官不免

食官私田園瓜果

諸於官私田園輒食瓜果之類坐贓論棄毀者亦如之  
即持去者準盜論

疏義曰稱瓜果之類即雜蔬菜等皆是若於官私田  
園之內而輒私食者坐贓論其有棄毀之者計所棄毀

亦同輒食之罪故云亦如之持將去者計贓準盜論並徵所費之贓各還官主

主司給與者加一等彊持去者以盜論主司即言者不坐非應食官酒食而食者亦準此

疏義曰當園主司將瓜果之屬給與人食者加坐贓罪一等謂一尺筴三十一疋加一等給與將去者準盜上加一等一尺杖七十一疋加一等彊持去者謂以威若力彊持將去者以盜論計贓同真盜之法其

贓倍徵贓滿五疋者免官監臨主司自疆取者加凡  
盜罪二等除名倍贓並依常律主司當即言告者主  
司不坐非應食官酒食而輒食者亦準此謂輒食者  
坐贓論棄毀者亦同持去者準盜論疆持去者以竊  
盜論若主司私持去者並同監主盜法若非主司不  
因食次而持去者以盜論強者依強盜法

棄毀器物稼穡

諸棄毀官私器物及毀伐樹木稼穡者準盜論即亡失

及誤毀官物者各減二等

疏義曰棄毀官私器物謂是雜器財物輒有棄擲毀壞及毀伐樹木稼穡者種之曰稼餘之曰穡麥禾之類各計贓準盜論即亡失及誤毀謂亡失及誤毀官私器物樹木稼穡者各減故犯三等謂其贓並備償若誤毀失私物依下條例償而不坐

毀人碑碣石獸

諸毀人碑碣及石獸者徒一年即毀人廟主者加一等

其有用功修造之物而故損毀者計庸坐贓論各令修立誤損毀者但令修之不坐

疏義曰喪葬令五品以上聽立碑七品以上立碣塋域之內亦有石獸其有毀人碑碣及石獸者徒一年即毀人廟主者加一等徒一年半其有用功修造之物謂樓觀垣塹之類而故損毀者計修造功庸坐贓論謂十匹徒一年十匹加一等仍令依舊修立若誤毀損者但令修立不坐

停留請受軍器

諸請受軍器事訖停留不輸者十日杖六十十日加一等百日徒一年過百日不送者減私有罪二等其棄毀者準盜論

疏義曰請受軍器謂鍔甲稍弩弓箭之類征戍事訖停留不輸者十日杖六十十日加一等百日徒一年過百日不送者減私有罪二等擅興律私有甲一領流上減二等徒二年半之類其有或棄或毀者準盜



論各依盜律盜甲弩者流二千里禁兵器徒二年如  
此之類並名盜法

若亡失及誤毀傷者以十分論亡失一分毀傷二分杖  
六十亡失二分毀傷四分杖八十亡失三分毀傷六分  
杖一百即不滿十分者一當一分論其經戰陣而有損  
失者不坐儀仗各減二等

疏義曰請官罷仗若亡失及誤毀傷者以十分論謂  
請百事十事為一分之類若亡失一分或毀傷二分

假有請百事亡失十事或毀傷二十事各杖六十若亡失二分毀傷四分杖八十亡失三分毀傷六分杖一百其分數各與上解義同罪止杖一百即不滿十分者一當一分論謂請九事為九分之類亦依亡失毀傷準分為罪仍依令備償其經戰陣而損失者不坐不償儀仗各減二等儀仗謂非兵器者若有亡失誤毀各依十分之法各減軍器罪二等若亡失毀傷罪名不等者即以重法併滿輕法

棄毀官私器物

諸棄毀亡失及誤毀官私器物者各備償

謂非在倉庫而別待守者

若被強盜者各不坐不償即雖在倉庫故棄毀者徵償

如法其非可償者坐而不備

謂符印門鑰官文書之類

疏義曰官私器物其有故棄毀或亡失及誤毀者各備償註云謂非在倉庫而別待守者謂倉庫之外別處持守而有棄毀亡失及誤毀官私器物始合備償若被強盜各不坐不償雖在倉庫之內若有故棄毀

徵償如法其非可償者止坐其罪不合徵償故註云  
謂符印門鑰官文書稱之類者實節木契制勅並是

亡失符印求訪

諸亡失器物符印之類應坐者皆聽三十日求訪不得  
然後決罪若限內能自訪得及他人得者免其罪限後  
得者追減二等

疏義曰若亡失器物符印之類寶及門鑰亦同為亡  
失應合罪者未得即決皆聽三十日求訪限滿不得

然後決罪若三十日內自訪得及他人得者免其亡失之罪三十日限外得者追減三等若已經奏決不合追減

官文書制書程限內求訪得者亦如之

疏義曰官文書及制書程限內求訪得者謂曹司執行案各有程限公式令小事五日程中事十日程大事二十日程徒罪以上獄案辯定後三十日程其制勅皆當日行下若行下處多事須抄寫依公式令滿

二百紙以下限二日程每二百紙以上加一日程所  
加多者不得過五日赦書不得過三日若有亡失各  
於此限內訪得者亦得免罪限外得者坐如法然制  
勅事重程限一日如有稽廢得罪不輕若許以三旬  
追訪稽者皆須注失所以不與亡失器物同例若官  
文書制書事已行訖無程者亦依三十日為限  
即雖故棄擲限內訪得聽減一等

疏義曰器物符印之類以下雖有窺避而故棄擲限

內訪得者聽減本失罪一等

得宿藏物

問答一

諸於他人地內得宿藏物隱而不送者計合還主之分

坐贓論減二等

若得古器形制異而不送官者罪亦如之

疏義曰謂凡人於他人地內得宿藏物者依令合與

地主中分若有隱而不送計應合還主之分坐贓論

減三等罪止徒一年半註云若得古器形制異而不

送官者謂得古器鍾鼎之類形制異於常者依令送

官酬直隱而不送者即準所得之器坐贓論減三等  
故云罪亦如之

問曰官田宅私家借得令人佃食或私田宅有人借  
得亦令人佃作人於中得宿藏各合若為分財

答曰藏在地中非可預見其借得官田宅者以見住  
見佃人為主若作人及耕犁人得者合與佃住之主  
中分其私田宅各有本主借者不施功力而作人得  
者合與本主中分借得之人既非本主又不施功不



合得分

得闌遺物

諸得闌遺物滿五日不送官者各以亡失罪論賊重者坐賊論私物坐賊減二等

疏義曰得闌遺之物者謂得寶印符節及雜物之類即須送官滿五日不送者各得亡失之罪賊重者謂計賊重於亡失者坐賊論罪止徒三年私物坐賊論減二等罪止徒二年其物各還官主

違令

諸違令者笞五十

謂令有禁制而律無罪名者

別式減一等

疏義曰令有禁制謂儀制令行路賤避貴來避去之類此是令有禁制律無罪名違者得笞五十別式減一等謂禮部式五品以上服紫六品以下服朱之類違式文而着服色者笞四十是名別式減一等物仍沒官

不應得為

諸不應得為而為之者笞四十

謂律令無條理不可為者

事理重者

杖八十

疏義曰雜犯輕罪觸類弘多金科玉條包羅難盡其有在律在令無有正條若不輕重相明無文可以比附臨時處斷量情為罪庶補遺闕故立此條情輕者笞四十事理重者杖八十

唐律疏義卷二十七

欽定四庫全書

唐律疏義卷二十八

唐 長孫無忌等 撰

捕亡

凡一十  
八條

疏義曰捕亡律者魏文侯之時里悝制法經六篇捕  
法第四至後魏名捕亡律北齊名捕斷律後周名逃  
捕律隋復名捕亡律然此篇以上質定刑名若有逃  
亡恐其滋蔓故須捕繫以寘疏網故次雜律之下

將吏追捕罪人

諸罪人逃亡將吏已受使追捕而不行及逗留

謂故方便之者

雖行與亡者相遇人仗足敵不聞而退

者各

減罪人罪一

等聞而退者減二等即人仗不敵不聞而退者減三等

聞而退者不坐

疏義曰依捕亡令囚及征人防人流人移鄉人逃亡

及欲入寇賊若有賊盜及被傷殺並須追捕其罪人

逃亡謂犯罪事發而亡口與未囚並是將吏已受使

追捕者謂見任武官為將文官為吏已受使追捕罪人而不行及逗留謂故作迴避逗留及詐為疾患不去之類雖行與亡者相遇人兵器仗足得相敵不戰鬥而退者各減罪人罪一等謂罪人合死將吏處流三千里之類聞而退者謂人仗足敵聞而退者減二等若罪人應死將吏合徒三年即人仗不敵謂賊多兵少或罷仗不敵不聞而退者減三等罪人應死將吏徒二年半聞而退者不坐謂人仗不敵計盡力窮

知難而退者不坐

即非將吏臨時差遣者各減將吏一等三十日內能自捕得罪人獲半以上雖不得半但所獲者最重皆除其罪雖一人捕得餘人亦同若罪人已死及自首各盡者亦從免法不盡者止以不盡為坐

疏義曰即非將吏謂非見任文武官即停家職資

釋曰

停家職資謂前職前官

及勲官之類臨時州縣差遣領人追捕

者各減將吏罪一等雖非將吏奉勅差行者亦同將



吏之法不在減一等之限三十日內自捕得罪人獲半以上謂十人逃亡獲得五六者雖不得半但所獲者最重假有徒流死囚一時逃走捕得死罪一人雖不得徒流九人仍除其罪雖是一人捕得衆共失囚之人並同免法若罪人已死謂自死及被他人殺若能歸首十人俱盡者亦從免法若罪人自首不盡止以不盡之人準罪為坐

限外若配贖以後能自捕得者各追減三等即為人捕

得及罪人已死若自首各追減二等

已經奏決者不在追減之例餘條追

此減準

疏義曰失罪人經三十日追捕不得無官蔭者或配徒流有官蔭者或已徵贖此後能自捕得罪人各追減前所斷罪三等即他人捕得及罪人身死訖若罪人自首各得追減二等註云已經奏決者不在追減之例謂將吏以下失罪人其罪已經奏決徒流笞杖之類不在追減之例餘條追減準此謂亡失寶印及

不覺失囚等稱追減者若事經奏決亦不在追減之例故云餘條準此

罪人持仗拒捍

諸捕罪人而罪人持仗拒捍其捕者格殺之及走逐而

殺

走者持仗  
空手等

若迫窘而自殺者皆勿論

疏義曰捕罪人謂上條將吏以下捕罪人而罪人乃持仗拒捍仗謂兵器及杵棒之屬其捕者以其拒捍因而格殺之及罪人逃走捕者逐而殺之註云走者

持仗空手等慮其走失故雖空手亦許殺之若迫窘而自殺謂罪人被捕逼迫窮窘或自殺或落坑穽而死之類皆悉勿論

即空手拒捍而殺者徒二年已就拘執及不拒捍而殺折傷之各以鬪殺傷論用刀者從故殺傷法

疏義曰謂罪人空手雖相拒捍不能為害而格殺之者徒二年若罪人已被拘執及原無拒捍之心而殺或折傷之各依鬪訟律以鬪殺傷論用刀者從故殺傷

法

罪人本犯應死而殺者加役流即拒毆捕者加本罪一等傷者加鬪傷二等殺者斬

疏義曰謂罪人本犯合死已就拘執及不拒捍而捕殺之者加役流即拒毆捕者加本罪一等假有罪人本犯徒三年而拒毆捕人流二千里傷者加鬪傷二等假有拒毆捕者折一齒加凡鬪二等合徒二年之類殺捕人者斬捕人不限貴賤殺者合斬

被毆擊姦盜捕法

問答

諸被人毆擊折傷以上若盜及強姦雖傍人皆得捕繫

以送官司

捕格法準上條即姦同籍內雖和聽從捕格法

疏義曰有人毆擊他人折齒折指以上若盜及強姦雖非被傷被盜被姦家人及所親但是傍人皆得捕繫以送官司捕格法準上條持仗拒捍其捕者得格殺之持仗及空手而走者亦得殺之其拒捕不拒捕並同上條捕格之法即姦同籍內言同籍之內明是

不限良賤親疎雖和姦亦聽從上條捕格之法

問曰親戚共外人和姦若捕送官司即於親有罪律許捕格未知捕者得告親罪以否

答曰若男女俱是本親合相容隱既兩俱有罪不合捕格告言若所親共他人姦他人即合有罪於親雖合容隱非是故相告言因捕罪人事相連及其於捕者不合有罪和姦之人兩依律斷

若餘犯不言請而輒捕繫者笞三十殺傷人者以故殺

傷論本犯應死而殺者加役流

疏義曰若餘犯不言請謂非毆擊人折傷以上若盜及強姦或和姦同籍內此外有犯須言請官司不得輒加捕繫如捕繫者笞三十因而殺傷人者以故殺傷論本死應死謂餘犯合死捕而殺者合加役流

道路行人捕罪人

諸追捕罪人而力不能制告道路行人其行人力能助之而不助者杖八十勢不得助者勿論

勢不得助者謂  
隔險難及馳驛



類之

疏義曰追捕罪人謂將吏以下據法追捕及在律文聽私捕繫而力不能拘制告道路行人其行人力能助之謂行者人仗堪制罪人而不救助之者行人合杖八十勢不得助者謂隔川谷垣籬壅柵之類不可踰越過者及馳驛之類稱之類者官有急事及私家救疾赴哀情事急速亦各無罪

捕罪人漏露其事

諸捕罪人有漏露其事令得逃亡者減罪人罪一等

罪人

有數罪但以所  
收捕罪為坐

疏義曰捕罪人謂上條將吏以下受使追捕而有漏  
露應捕之事令使罪人逃避者漏露之人減罪人罪  
一等註云罪人有數罪者假有一人或行強盜兼復  
殺人又欲謀叛若為謀叛而捕漏露者唯從謀叛減  
一等若為賊盜或殺人而捕漏露者即從賊盜殺人  
上減一等等不論謀叛故云但以所收捕罪為坐

未斷之間能自捕得除其罪相容隱者為捕得亦同  
條餘  
相容隱為捕得準此即他人捕得若罪人已死及自首又各減一  
等

疏義曰未斷之間謂漏露之罪未經斷定能自捕得  
罪人者除其失囚之罪相容隱者為捕得謂同居及  
大功以上親外祖父母外孫若孫之婦夫之兄弟及  
兄弟妻奴婢部曲為主捕得並同身自捕獲皆除其  
罪註云餘條相容隱為捕得準此假如上條將吏受

使追捕罪人致失者相容隱捕得亦與自捕得同故云亦準此即他人捕得若罪人已死謂自死及被他  
人殺者皆同及自首又各於罪人上更減一等總減  
罪人罪二等

隣里被強盜

諸隣里被強盜及殺人告而不救助者杖一百聞而不  
救助者減一等力勢不能赴救者速告隨近官司若不  
告者亦以不救助論其官司不即救助者徒一年竊盜

者各減二等

疏義曰依禮五家為隣五隣為里既同邑落隣居接續而被強盜及殺人者皆須遞告即救助之若告而不救助者杖一百雖不承告聲響相聞而不救助者減一等杖九十力勢不能赴救者謂賊強人少或老小羸弱不能赴救者速告隨近官司若不告者亦以不救助罪科之其官司不即救助者依捕亡令有盜賊及殺傷者即告隨近官司村坊屯驛聞告之處率隨

近軍人及夫從發處追捕若其所在官司知而不即救助者徒一年竊盜各減二等謂隣里被竊盜承告而不救助者從杖一百上減聞而不救助者從杖九十上減官司承告不即救助者從徒一年上減

從軍征討亡

諸征名已定及從軍征討而亡者一日徒一年一日加一等十五日絞臨對寇賊而亡者斬主司故縱與同罪

下條  
準此

疏義曰征名已定謂衛士及募人征名已定訖及從軍征討而亡者一日徒一年一日加一等八日流三千里十五日絞若臨對寇賊謂壁壘相對矢石將交而亡者斬亦據應戰之人主司故縱與同罪謂主司知情容其亡避各與亡者罪同亡者合斬主司合絞註云下條準此謂下條向防及在防未滿而亡者主司故縱亦各同罪其臨對寇賊而有亡者但亡即坐不計日數及行遠近其有從軍征討而亡未滿十五

日軍還者未還以前依征亡之法征還之後從軍還亡罪而斷將未還之日併滿軍還之日累科

軍還而先歸者各減五等其逃亡者同在家逃亡法

疏義曰軍雖凱還須依部伍若不隨團隊而輒先歸者各減軍亡罪五等其逃亡者同在家逃亡法謂一日笞四十十日加一等罪止流二千里若軍還先歸一日徒一年上減五等合杖六十罪止徒一年半日若少從先歸日科日若多從有軍名亡法



防人向防

諸防人向防及在防未滿而亡者

鎮人亦同

一日杖八十三

日加一等

疏義曰防人向防謂上道訖逃走及在防年限未滿而亡者鎮人亦同一日杖八十三日加一等既無罪止之文加至流三千里亡日未到罪止鎮防日已滿者計應還之日同在家亡法累併為罪

流徒囚役限內亡

諸流徒囚役限內而亡者

犯流徒應配及移鄉人未到配所而亡者亦同一日

笞四十三日加一等過杖一百五日加一等

疏義曰流徒囚謂或流或徒者各其在役限內而亡者註云犯流徒應配及移鄉人未到配所而逃亡者各與流徒囚役限內而亡罪同一日笞四十三日加一等十九日合杖一百過杖一百五日加一等五十  
九日流三千里

主守不覺失囚減囚罪三等即不滿半年徒者一人笞

三十三人加一等罪止杖一百監當官司又減三等  
故縱者各與同罪

疏義曰主守謂主守囚徒之人及部領流移人等不  
覺囚亡減囚罪三等謂從囚本罪上減三等不從逃  
坐減之即不滿半年徒者謂徒役將滿餘日不滿半  
年徒而有逃亡者不計逃日而科唯據亡人之數為  
罪一人答三十三人加一等謂四人亡合答四十不  
覺二十二人工亡即至罪止合杖一百監當官司又減

三等謂減主守罪三等不覺二十二人亡者罪止杖七十故縱者各與同罪稱各者謂監當官司及主守各與亡囚本犯罪同

宿衛人亡

問答

諸宿衛人在直而亡者一日杖一百二日加一等即從駕行而亡者加一等

疏義曰宿衛人謂諸衛大將軍以下當番衛士以上在直番限內而有逃亡者一日杖一百二日加一等

計一十七日流三千里直滿以後即同在家亡法即從駕行者以其陪從事重故加宿衛一等之坐亡者一日徒一年二日加一等十五日流三千里

問曰衛士於宮城外守衛或於京城諸司守當或被配於王府上番如此之徒而有逃亡者合科何罪

答曰宮城之外兼及皇城京城若有逃亡罪亦與宿衛不別若有準減三等之例即太輕於在家而亡是知守當雜犯有減三等之科逃亡之辜得罪與宿衛

不異

丁夫雜匠亡

問答

諸丁夫雜匠在役及工樂雜戶亡者

太常音聲人亦同

一日笞

三十十日加一等罪止徒三年主司不覺亡者一人笞二十五人加一等罪止杖一百故縱者各與同罪

疏義曰丁謂正役夫謂雜徭及雜色工匠諸司工樂雜戶註云太常音聲人亦同丁夫雜匠並據在役逃亡工樂以下在家亡者亦是一日笞三十十日加一

等罪止徒三年主司謂監當主司不覺逃亡者計人數坐之一人笞二十五人加一等四十一人逃亡即至罪止杖一百主司故縱者各與逃亡者同罪

即人有課役全戶亡者亦如之若有軍名而亡者加一等其人無課役及非全戶亡者減二等即女戶亡者又減三等其里正及監臨主司故縱戶口亡者各與同罪不知情者不坐

疏義曰人有課役謂或有課無役或有役無課而全

戶亡者亦如丁夫在役逃罪一日笞三十十日加一等罪止徒三年若有軍名而亡謂衛士掌閑駕士幕士之類名屬軍府者總是有軍名其幕士屬衛尉駕士屬太僕之類不隸軍府者即不同軍名之例有軍名而亡者雖非全戶加一等合流二千里其人無課役謂全戶亡者其有課役謂非全戶亡者各減有課役全戶亡罪二等罪止徒二年若其人無課役又非全戶亡者又減二等罪止徒一年即女戶亡亦謂全戶



而亡者又減三等總減有課役亡者五等罪止杖一百婦女非全戶亡又減二等合杖八十其里正及監臨主司折衝府於軍人亦同監臨之例故縱戶口軍人亡者各與亡者罪同不知情者不坐

問曰有軍名而亡於他處附貫課役如法唯無軍名合當何罪

答曰逃亡之罪多據闕課無課之輩責其浮遊亦既編戶見在課役如法準式仍徵賦役附處復有課輸

於官課役無違唯免軍名合罪依例逃亡自首減罪  
二等坐之仍勒還本所

浮浪他所

諸非亡而浮浪他所者十日笞二十日加一等罪止  
杖一百即有官事在他所事了留住不還者亦如之若  
營求資財及學宦者各勿論闕賦役者各依亡法

疏義曰非亡謂非避事逃亡而流宕他所者十日笞  
二十日加一等一百九十日罪止杖一百即有官

事已了留住不歸者亦同浮浪之罪若營求資財者  
謂貿遷有無遠求利潤及學宦者或負笈從師或棄  
繻求仕各遂其業故並勿論闕賦役者各依亡法謂  
因此不歸致闕賦役各準逃亡之法依狀科罪若全  
戶者罪止徒三年非全戶者減二等

官戶奴婢亡

諸官戶官奴婢亡者一日杖六十三日加一等

部曲私  
奴婢亦

同主司不覺亡者一口笞三十五口加一等罪止杖一

百故縱官戶亡者與同罪奴婢準盜論即誘導官私奴婢亡者準盜論仍令備償

疏義曰官戶及官奴婢逃亡者一日杖六十三日加一等註云部曲私奴婢亦同部曲雖取良人之女其妻若逃亡罪同部曲主司不覺謂不覺官戶官奴婢亡者一口笞三十五口加一等三十六口罪止杖一百故縱官戶亡者同官戶逃亡之罪罪止流準加杖二百之法故縱官奴婢亡者準盜論謂計贓五足徒

一年五足加一等即誘導官私奴婢亡者謂不將入已導引令亡者並準盜論五足徒一年五足加一等仍令備償故縱亡者得罪不償若誘導官戶部曲亡者律無正文當不應得為從重杖八十與同行者同過致資給之罪

在官無故亡

諸在官無故亡者一日笞五十三日加一等過杖一百五日加一等邊要之官加一等

疏義曰在官謂在令式有負見在官者無故私逃者  
一日笞五十三日加一等過杖一百五日加一等五  
十六日流三千里邊要之官戶部式靈勝等五十九  
州為邊州此乃居邊為要亡者加罪一等謂品官以  
上一日杖六十三日加一等

被囚禁拒捍走

問答一

諸被囚禁拒捍官司而走者流二千里傷人者加役流  
殺人者斬從者絞若私竊逃亡以徒亡論

事發未囚而亡者亦同

疏義曰被囚禁不限有罪無罪但據狀應禁者散禁亦同拒捍官司而強走者流二千里傷人者謂因拒捍傷主司及捕捉之人者加役流殺人者斬從者絞不至死者依首從法若私竊逃亡謂被囚禁而私逃者從上條流徒囚役限內而亡一日笞四十三日加一等過杖一百五日加一等此是事發更為合重其坐註云事發未囚謂罪人事發被追拒捍官司逃走及私竊逃亡亦與在禁逃亡罪同

問曰有人據狀不合禁身被官人枉禁拒捍官司逃走合得何罪

答曰本罪不合囚禁枉被官人禁留雖即逃亡不合與囚亡之罪若有拒捍殺傷止同故殺傷法私竊逃亡同在家逃亡之罪若判案禁者雖本無罪亦同囚例

主守不覺失囚

諸主守不覺失囚者減囚罪二等若因拒捍而走者又



減二等皆聽一百日追捕限內能自捕得及他人捕得  
若囚已死及自首除其罪即限外捕得及囚已死若自  
首者各又追減一等

疏義曰主守者謂專當守囚之人典獄之類不覺失  
囚者減囚罪二等假失死囚合徒三年之類若囚拒  
捍強走力不能制又減二等皆聽一百日追捕限內  
能自捕得及他人捕得者不限親疎若囚已死及自  
歸首並除失囚之罪即百日限外捕得及囚已死若

囚自首各又追減失囚本罪一等稱追減者謂失囚之罪已經斷訖者仍更追減若已奏決者不在追減之例

監當之官各減主守三等故縱者不給捕限即以其罪罪之未斷決間能自捕得及他人捕得若囚已死及自首各減一等

謂此篇內監臨主司應坐當條不立捕訪限及不覺故縱者並準此法

疏義曰當監之官謂檢校專知囚者即當直官人在直時其判官準令合還而失囚者罪在當直之官各

減主守三等謂減囚罪五等囚若拒捍而走得減囚  
罪七等之類故縱者不給捕限謂主守及監當之官  
故縱囚逃亡者並不給限捕訪即以其罪罪之者謂  
縱死囚得死罪縱流徒囚得流徒罪之類未斷決間  
謂官當收贖者未斷死及笞杖者未決能自捕得及  
他人捕得若囚已死及自首各減一等

註謂此篇內監臨主司應坐當條不立捕訪限及不  
覺故縱者並準此法

疏義曰上條征人逃亡者主司故縱與同罪及流徒  
囚限內而亡監當官司不立捕限及不覺故縱如此  
之類並準此條為法

容止他界逃亡

諸部內容止他界逃亡浮浪者一人里正答四十

謂經十五

日以上者坊正村正同里正之罪若將家口逃亡浮浪者一戶同一人為罪四人加一等縣

內五人答四十十人加一等州隨所管縣通計為罪

皆以

長官為首佐職為從各罪止徒二年其官戶部曲奴婢亦同

疏義曰部內謂部界之內容止他界逃亡浮浪者一人里正笞四十謂容止經十五日以上始科里正之罪坊正村正部內容止逃亡亦同里正之罪若將家口逃亡浮浪者家口不限多少一戶同一人為罪四人加一等即五人逃亡及以浮浪笞五十二十五人杖一百三十七人徒二年縣內五人笞四十十人加一等九十五人合徒二年州隨所管縣通計為罪謂州管二縣者十人笞四十一百九十人徒二年管縣

更多準此通計為坐皆以長官為首佐職為從既無  
以下之文即明不及主典各罪止徒二年其容止官  
戶部曲奴婢亦同良人之法

若在軍役有犯者隊正以上折衝以下各準部內有盜  
賊之法

疏義曰稱軍役有犯者謂於行軍征役之所容止逃  
亡浮浪即準州縣以下得罪隊正隊副同里正校尉  
旅帥減隊正一等折衝果毅隨所管校尉多少為罪

故云隊正以上折衝以下各準部內有盜賊之法

知情藏匿罪人

問答

諸知情藏匿罪人若過致資給

謂事發被追及亡叛之類

令得隱避

者各減罪人罪一等

藏匿無日限過致資給亦同若卑幼藏隱匿狀已成尊長知而聽之

獨坐卑幼部曲奴婢首匿主後知者與同罪即尊長匿罪人尊長死後卑幼仍匿者減五等尊長死後雖經匿但已遣去而事發及匿得相容隱者之侶並不坐小功以下亦同減例若赦前藏匿罪人而罪人不合赦免赦後匿如故不知人有罪容寄之後知而匿者皆坐如律其展轉相使而匿罪人知情者皆坐不知者勿論

疏義曰知情藏匿謂知罪人之情主人為相藏隱過

致資給者謂指授道途送過險處助其運致并資給  
衣糧遂使凶人潛隱他所註云謂事發被追若非事  
發未是罪人故須事發被追始辯知情之狀及亡叛  
之類謂逃亡或叛國雖未追攝行即可知過致資給  
令隱避者減罪人罪一等合流三千里之類稱之類  
者或有亡命山澤不從追喚皆是

註藏匿無日限過致資給亦同若卑幼藏隱匿狀已  
成尊長知而聽之獨坐卑幼部曲奴婢首匿主後知



者與同罪

疏義曰藏匿無限日者謂不限日之多少但藏匿即坐過致資給亦同無日限若卑幼藏隱匿狀既成以其同居得相容隱故尊長知而聽之獨坐卑幼尊長不坐部曲奴婢作首隱匿罪人主後知者與同罪謂同部曲奴婢各減罪人罪一等以主為部曲奴婢隱故也

註即尊長匿罪人尊長死後卑幼仍匿者減五等尊

長死後雖經匿但已遣去而事發及匿得相容隱者之侶並不坐小功以下亦同減例

疏義曰謂尊長在日自匿罪人容其相隱尊長死後卑幼匿之如故亦不限日之多少減尊長罪五等總減罪人罪六等尊長死後雖經匿但發遣去後罪始發覺及匿得相容隱者之徒侶假有大功之親共人行盜事發被迫俱來藏匿若糾其徒侶親罪即彰恐相連累故並不與罪小功以下亦同減例即例云小

功以下相容隱減凡人三等今匿小功緦麻親之侶亦準此例減之總減罪人罪四等故云亦同減例  
註若赦前藏匿罪人而罪人不合赦免赦後匿如故不知人有罪容寄之後知而匿者皆坐如律

疏義曰赦前藏匿罪人而罪人不合赦免假有匿十惡人會赦十惡不合赦免赦後匿如故及不知人有罪容寄之後知而匿者並依藏匿之罪科之

註其展轉相使而匿罪人知情者皆坐不知者勿論

疏義曰展轉相使匿罪人假有甲知情匿罪人又囑付乙令匿乙又囑丙遣匿如此展轉相使匿者乙丙知是罪人得藏匿之罪不知情者無罪故云勿論罪人有數罪者止坐所知

疏義曰罪人有數罪謂或殺人或姦盜止坐所知者謂於所知之罪上減一等之類

問曰有奴婢匿一流囚主後知之合得何罪

答曰有奴婢首匿流囚罪合減一等徒三年加杖二

百主後知者與奴婢同科亦準奴婢之罪合杖二百  
其應例減收贖各準其主本法仍於二百上減贖若  
奴婢死後主匿如故即得自匿之罪一合準奴婢為  
坐

唐律疏義卷二十八